

Naqqiut

Taarserpai nassuaatit 16- august 2022-imeersut

(Tusarniaanermiit akissutaasut Oqaasileriffimmeersut aamma ataatsimoorussanik
akissuteqaatit danskit tusagasiortut kattuffianniit- Dansk Journalistforbund aamma t
Tusagassiunermi Sulisut Peqatigiiffiat tusarniaanermut immikkoortumi ilanngunneqarput.)

Siunnersummut nassuaatit

Nassuaatit nalinginnaasut

1. Aallaqqaasiut

1.1. Siunnersummut pingaarnertut tunuliaqutaasut

Inatsisartut Inatsisaat nr. 7, 8. juni 2014-imeersoq ullormi 1. august 2014 atuutilersimasoq aqqutigalugu Radiukkut tv-kkullu aallakaatitsisarneq pillugu Inatsisartut Inatsisaata atuuttup suliarineranut atatillugu atuisunut siunnersuisoqatigiit aqqutigalugit allaffissornikkut immikkoortumik pilersitsisoqarnissaa pillugu malittarisassanik ilanngussisoqarsimavoq, tassanilu KNR-ip aallakaatitassiornerata pitsaassutsikkut qaffaaffiginissaa siunertaasimavoq. Naallu naalakkersuinikkut suliallit akulerutinnginnissaannut tunngavik tunngavigalugu siunnersuisoqatigiit KNR-ip sulineranut sunniuteqartussaanngikkaluartut siunnersuisoqatigiit inunnik 9-nik katitigaasut KNR-ip siulersuisuinut pitsaassutsikkut suleqataanissaat pingaarnertut anguniagaasimagaluarpoq. Tamannalu aqqutigalugu atuisut pisariaqartitaannut tunngatillugu suliffeqarfiup sulineranut pitsaassutsimut KNR-ip qaffaaniarnissaanut siunnersuisoqatigiit ilanngussaqartussaasimapput.

Atuisunut Siunnersuisoqatigiit aamma KNR-ip siulersuisusa qaffassarnissaannut ilaasumik pilersinneqarsimapput. Pikkorinnerusunik sulisoqalernissamut eqqarsaataasumut atatillugu siulersuisuni ilaasortat 7-nit 5-nut ikilisinneqarsimapput. Peqatigitillugu atuisunut siunnersuisoqatigiit pilersinneqarput. Atuisunut Siunnersuisoqatigiit 9-nik ilaasortaqarput, taakkulu Inatsisartut Inatsisaat aqqutigalugu kattuffiit soqutigisaqaqatigiillu toqqarneqartut arlallit inassuteqareernerisigut Naalakkersuisunit toqqarneqartarput. Taakkununnga ilaatigut kattuffiit soqutigisaqaqatigiillu 4-mat ilaapput, taakkulu pikkorinnerusunik sulisoqalernissap anguniarnera tikillugu KNR-ip siulersuisuinut ilaasortassamik immikkut inassuteqartussaasimapput, taakkulu siulersuisunut ilaasortassanik toqqagassanik inassuteqarnissamut piginnaatitaaffitsik annaareerlugu isummaminnek siulersuisunut ingerlatitseqqinniartartussaasimapput.

Kisiannili atuisunut siunnersuisoqatigiit siunertarineqartoq malillugu sulisinnaasimanngitsut paasineqarsimavoq. Ataatsimiittarnerit killeqarsimapput, siulersuisullu aamma Atuisunut Siunnersuisoqatigiit akornanni suleqatigiinnissaaq kissaatigineqartoq aamma upternarsarneqarsinnaasimanngilaq. Taamaattumik Atuisunut Siunnersuisoqatigiit

atorunnaartariaqartut, siulersuisullu paarlattuanik assersuutigalugu atuisut oqallitarfiisigut paasisaqarsinnaalissasut KNR-mut siulersuisut oqaatigisimavaat.

Tamanna Inatsisartut inatsisaannik allangortitsinissaq pillugu siunnersuuteqarnissamut aallaaviusimavoq, taamaasilluni Atuisunut Siunnersuisoqatigiit pillugit malittarisassat atorunnaarsimallutik. Peqatigitillugu aallakaatitassortarneq pillugu KNR-ip innuttaasunik oqaloqateqartarnera pillugu aalajangersagaq soqutigisallit attuumassutillit aamma ilanngullugit annertusineqassasoq siunnersuutigineqarpoq.

Ilanngullugu siunnersuut KNR-tv-mi pilerisaarutit 2-k naalakkersuinikkut isummanik ilallit inatsisitigut unioqqutitsisuunnginnerannut suliamut 2021-mi aasakkut pisimasumut attuumassuteqarpoq, taannalu Radium tv-milu pilerisaarutit aallakaatitassianillu aningaasalersuisarnerit pillugit Namminersornerullutik Oqartussat nalunaarutaanni nr. 8, 5. juli 2006-imeersumi (pilerisaarisarnermut nalunaarut) § 17, imm. 2-mut atuuttumut attuumassuteqarsimavoq. Tv-kkut upperisarsiornikkut naalakkersuinikkulluunniit isummanut pilerisaarisqarsinnaanngitsoq aalajangersakkami takuneqarsinnaasimavoq.

Naalakkersuinikkut upperisarsiornikkullu isummat tv-mi siuarsaaffigineqarsinnaannginnissaat aalajangersakkap kingunerivaa. Aalajangersakkami aningaasarsiornikkut equusoortoqannginnissaanut tamat oqartussaaqataanerisigut aalajangeeriaaseq aammalu naalakkersuinikkut oqallinnerit tamallu oqallinnerat illersornissaat siunertaasimavoq. Inerteqquteqartitsinerup taamaallaat tv-mi pilerisaarisarnermuinnaq tunngassuteqarnera innuttaasut nalilersuisinnaanerannut immikkut sunniuteqarluni tv-ip qitiulluni naalagaaniarfiullunilu ingerlanneranut atasutut isigineqassaaq, tassami tv-kkut tusagassiorfik amerlanertigut nutaarsiassalerinermi arlaannut attuumassuteqanngitsutut kinaassusersiunngitsutullu sanillersuunneqartarmat.

Tamatuma saniatigut aalajangersagaq naalakkersuinikkut isummat ilaat soqutigisalinnit aningaasarsiornikkut naalakkersuinikkullu inissismalluartunik annertuumillu pilerisaarinissamut missingersuutilinnit aningaasalersorneqarsinnaanerat tunngavigalugu isigineqassaaq. Tv-kkut tusagassiorneq taamaasilluni soqutigisallit aningaasarsiornikkut nukissallit naalakkersuinikkut oqallinnerut akulerutsillugit ingerlatsiviulersinnaavoq.

Tamanna aamma qinersisoqarnerani inernermt sunniuteqarsinnaasutut nalinerneqarpoq, tassa soqutigisallit pineqartut isummaminnik qineequsaarnermi partiinut aalajangersimasunut avitseqarniarlutik pilerisaarilersinnaammata. Pilerisaarinermut suliniutit taamaattut tamat oqartussaanerannut ajornartorsiutaalissapput, tassami naalakkersuinikkut isummat nukittunerpaat nukissanik amerlanerpaanik tunuliaqtallit maluginiarneqarnissamut eqqaaneqarnissamullu tunngatillugu malunnarnerusumik iluaquserneqarsinnaassammata.

Ombudsmandi suliamut pineqartumut atatillugu oqarsimavoq pilerisaarisarnermut nalunaarutip 2006-imeersup atuuttup atortuulersinnerani radiokkut tv-kullu sulineq pillugu inatsisartut peqqussutaanni taamanikkut atuuttumi pilerisaarinermut naalakkersuinikkullu isummanut tv-mi inerteqquteqartitsinissamut malittarisassamik naammattumik

qularnaatsumillu inatsisitigut tunngavissaqarsimanngitsoq. Tamanna aamma atuuppoq radiokkut tv-kullu sulineq pillugu Inatsisartut inatsisaannut atuuttumut tunngatillugu. Taamaasilluni pilerisaarinermut nalunaarummik taamanikkut Naalakkersuisuusut 2006-imi atortussanngortitsimmatali pilerisaarinermut nalunaarummi § 17, imm. 2-p aalajangersaaffiginissaanut inatsisitigut tunngavissaqarsimanngilaq. Aalajangersagaq aamma Radiumi tv-milu pilerisaarutit aallakaatitassianillu aningaasalersuisarnerit pillugit Namminersornerullutik Oqartussat nalunaarutaanni nr. 3, 25. januar 1991-imeersumi § 11, imm. 1-imiittumik ingerlatitseqqinneruvoq.

Ombudsmandip ilaatigut erseqqissaatigivaa naalakkersuinikkut isummanik pilerisaarinernut inerteqquteqartitsineq inatsisitigut ersarissumik qularnaatsumillu tunngaveqarnissaa pisariaqartoq kiisalu radiumut tv-mullu inatsimmi § 47 inatsisitigut tunngavissamik taamaattumik ersarissumik qularnaatsumillu imaqqanngitsoq. Taamaamat Ombudsmandip isumaa tunngavigalugu pilerisaarinermut nalunaarummi § 17, imm. 2 pineqartoq apeqqutaatinnagu naalakkersuinikkut isummanut pilerisaarutinik aallakaatitsinernut inerteqquteqartitsisoqanngilaq, soorluttaaq upperisarsiornikkut isummanut tamanna atuuttariaqarluni.

Tassunga atatillugu malugineqassaaq Inatsisartut taamanikkut Radiukkut tv-kkullu aallakaatitassiorneq pillugu Inatsisartut peqqussutaanni nr. 3, 17. maj 1990-imeersumi § 26, imm. 2 aqqutigalugu inatsimmi immini allassimasumi aalajangersakkamik taamaattumik siusinnerusukkut aalajangersaanikuusimammata. Taamaakkaluartoq Radiukkut tv-kkullu aallakaatitassiorneq pillugu Inatsisartut peqqussutaata nr. 6, 14. november 2004-meersup akuersissutigineranut atatillugu aalajangersagaq inatsimmi allassimasuni ingerlateqqinneqarsimanngilaq, kisiannili ullormi 1. januar 2005 atortuulersinneranut atatillugu Radiumi tv-milu pilerisaarutit aallakaatitassianillu aningaasalersuisarnerit pillugit Namminersornerullutik Oqartussat nalunaarutaanni nr. 3, 25. januarimeersumi ingerlateqqinneqarsimalluni.

Tassunga atatillugu nalunaarummi tassani § 11, imm. 1-imi takuneqarsinnaalersimavoq isiginnaarutikkut upperisarsiornikkut naalakkersuinikkulluunniit isummanut pilerisaarisqaqqusaanngitsoq. Aalajangersagarlu taannaasimavoq nalunaarummi atuuttumi 2006-imi atortuulersinneqartumi ingerlateqqinneqarsimasoq.

Ombudsmandip oqaaseqaataata kingunerisaanik Radiumi tv-milu pilerisaarutit aallakaatitassianillu aningaasalersuisarnerit pillugit Namminersornerullutik Oqartussat nalunaarutaata allanngortinnissaa pillugu Namminersorlutik Oqartussat nalunaarutaat nr. 37, 6. august 2021-meersoq aqqutigalugu Naalakkersuisut allannguutissatut nalunaarummik atortussanngortitsipput, tassanilu § 17, imm. 2 atorunnaarpoq. Tassunga atatillugu isummersuutit Radiukkut tv-kkullu aallakaatitassiorneq pillugu Inatsisartut inatsisaata allanngortinnerani aalajangersakkap paarlattuanik ingerlateqqinnissaanut apeqqummut attuumassuteqarput.

1.2. Inatsisiliornissami pingaarnersiukkat

Ilinniartitaanermut, Kultureqarnermut, Timersornermut Ilageeqarnermullu Naalakkersuisoqarfip KNR-imik ataatsimeeqateqartarneranut atatillugu atuisunut siunnersuisoqatigiit sulineranut tunngatillugu, tassungalu atatillugu atuisut isumaat assigiinngisitaartut oqaloqatigiissutigineq ajornerannut pissarsiffiusumillu ilisaritittarnissaannut amigaateqarnerit pillugit ajornartorsiutinngorsimasunut ilisimatinneqarsimavoq. Tamanna allatut iliorluni KNR-ip soqutigisalinnut attuumassutilinnut oqaloqateqartarnissaata qulakteernissaanut pisussaaffiliinissamut isummersutinik massakkut aallartitsiffiusimavoq.

Ilanngullugu upperisarsiornikkut naalakkersuinikkullu isummat pilerisaarutigisarnerannut inerteqquteqartitsineq pillugu aalajangersagaq Naalakkersuisut Ombudsmandip allaffissornikkut aalajangersarneqarluni aalajangersakkap atorsinnaannginneranut oqaaseqarnera tusaatissatut tigusimammassuk oqaatigineqassaaq.

1.3. Siunnersuut ataatsimut isigalugu

Atuisunut siunnersuisoqatigiit pillugit aalajangersakkat KNR-ip innuttaasunuunnaanngitsoq, kisiannili aamma aallakaatitassiortarneq pillugu soqutigisalinnut attuumassutilinnut oqaloqateqartarnissap qulakteernissaa pillugu pisussaaffimmik taarserneqassasoq siunnersuutigineqarpoq. Soqutigisalinnik attuumassutilinnik oqaloqateqartarneq taamaasilluni aallakaatitassiortarneq pillugu innuttaasunik oqaloqateqartarneq pillugu aalajangersakkamut atuuttumut (§ 26) tunngatillugu nutaajuvoq. Peqatigitillugu oqaloqateqartarnermi sunarpiaq pineqartassanersoq aalajangersakkami aalajangersarneqarpoq, tassalu pisussaaffinnik inatsisitigut aalajangersakkanik aalajangersimasunik KNR-ip eqortitsisarnissaa.

§ 26-ip nutaamik oqaasertalerneratigut KNR-ip qaqugukkulluunniit innuttaasunut soqutigisalinnullu attuumassutilinnut paasisaqarnissamut oqaloqateqarnissamullu periarfissaqalernissaa qulakteerneqassaaq.

Tv-kkut upperisarsiornikkut naalakkersuinikkullu isiginnittariaatsinut pilerisaarisarnernut inerteqquteqartitsinissaq inatsimmi allanneqartuni ilanngunneqassasoq ilanngullugu siunnersuutigineqarpoq. Tamanna taamaasilluni allaffissornikkut aalajangersarneqarluni aalajangersakkamut 2021-mi atorunnaartumut taartitut atorneqassaaq.

2. Siunnersummi immikkoortut pingaarerit

2.1. Inatsisit atuuttut

Inatsisit atuuttut Radiukkut tv-kkullu aallakaatitsisarneq pillugu Inatsisartut Inatsisaanni nr. 7, 8. juni 2014-imeersumiippuit. Inatsisartut inatsisaat radiumi tv-milu sulinerup iluani malittarisassanik nalinginnaasunik, KNR-imullu tunngatillugu suliffeqarfimmut malittarisassanik imaqarpoq. Inatsisartut inatsisaanni kapitali 4-mi KNR-imi siunertat

suliassallu pillugit aalajangersakkat aalajangersarneqarput. Tassani KNR-i aallakaatitassiorneq pillugu innuttaasunik oqaloqateqartarnissamik qulakkeerinnissasoq pillugu § 26 aalajangersakkatut ilanngunneqarpoq.

Inatsisartut inatsisaanni oqaloqateqarnerit qanoq isilluni qulakkeerneqarnissaat pillugit piumasaqaammik aalajangersaasoqarsimanngitsoq aalajangersakkanut nassuaatini atuarneqarsinnaavoq, KNR-illu taamaasilluni qanoq periuseqassanerluni nammineerluni toqqarsinnaavaa. Assersuutigalugu tassaasinnaapput naalaartartut isiginnaartartullu isumaannik paasiniaanerit, immersorlugit akisassat atorlugit paasiniaanerit imaluunniit internetikkut akioriinnerit imaluunniit allat. Tamatuma saniatigut aalajangersakkamut nassuaatini erseqqissarneqarpoq Atuisunut Siunnersuisoqatigiit § 33-mi taaneqartut taamatut oqaloqateqartarnissap anguniarnissaanut atortussatut isigineqarsinnaasut.

Atuisunut Siunnersuisoqatigiinnut tunngatillugu KNR-ip aallakaatitassiornermini qanoq isilluni pitsaanerpaamik KNR-imut siunertaliunneqartut suliakkiunneqartullu inatsimmi aalajangersagaasut isumaginissaannut KNR-imi siulersuisut siunnersornissaat siunertaralugu Naalakkersuisut Atuisunut Siunnersuisoqatigiinnik pilersitsissasut Inatsisartut inatsisaanni § 33, imm. 1-imi aalajangersagaavoq. Atuisunut Siunnersuisoqatigiit ukiut sisamakkaarlugit pilersinneqartarpoq, siullermik piffissami 1. august 2014 - 31. december 2018. Tassunga atatillugu aalajangersakkatigut paasinarsivoq atuisunut siunnersuisoqatigiit massakkut atuuffiat ullormi 31. december 2022 naassasoq. Massakkut atuuffiup naanerata kinguninngua Atuisunut Siunnersuisoqatigiit pillugit aalajangersakkap atorunnaarnissaata atuutilernissaa tulluartutut isigineqarsimavoq. Taamaammat inatsimmut allannguut ullormi 1. januar 2023 atuutilissasoq siunnersuutigineqarpoq.

Atuisunut Siunnersuisoqatigiit pillugit § 33-mi nassuaatini ilaatigut erseqqissarneqarpoq ilisimasat soqtigisallit inassutigineqartut pigisassaattut ilimagineqartut ilisaritittarnissaat siunertaralugu siunnersuisoqatigiit katitigaassasut. Soqtigisallillu aalajangersakkami taaneqartut tamarmik suliassat inatsimmi §§ 20-27 naapertorlugit KNR-p isumaginissaannut pisussaaffigisaanut imaritinneqartunut immikkut ilisimasaqarnissaat soqtigisaqarnissaallu ilimagineqartoq ilanngullugu erseqqissarneqarpoq.

Tassungalu atatillugu assersuutitut § 20, imm. 7-imut nassuaatit innersuussutigineqassapput, tassalu KNR aallakaatitassianik meeqlanu inuuasutunullu sammititanik neqeroortassasoq, § 24-mullu tunngatillugu KNR kalaallisut oqaatsit pigiinnarnissaannut ineriartorttsiffiunissaannullu tapeeqataassasoq. Taamatuttaaq § 20, imm. 6-imut nassuaatinut innersuussuteqartoqarpoq, tassalu aallakaatitassiornerni eqqumiitsuliorerup kulturillu aallakaatitassiarineranni suut pineqarnersut takutinneqartassasut kiisalu kalaallini inuiaqatigiinni kulturikkut soqtigisat amerlassusaat takutinneqartassasut. Tamatuma saniatigut KNR-ip § 20, imm. 8 malillugu anguniassavaa inuit innarluutillit aallakaatitatigut neqeroorutinut malinnaalerulernissaat kiisalu KNR-ip Kalaallit Nunaanni radioqarfiit tv-qarfiillu allat aallakaatitassiaat ikinnerpaaffilerlugit aallakaatittassagai, takuuk § 28, imm. 1, nr. 4.

Tamatuma saniatigut Atuisunut Siunnersuisoqatigiit taamaallaat siunnersuisarnikkut pisussaaffeqartut, taamaasillutilu ilitsersuisarnissamut arlaatigut pisussaaffeqanngitsut imaluunniit allatut siulersuisut aalajangiisarnerinut akulerussinnaanngitsut imaluunniit allatut iliorlutik toqqaannartumik suliffeqarfip aallakaatitassortarneranut sunniiniarsinnaanngitsut § 33, imm. 1-imi atuarneqarsinnaavoq. Taaneqartut tamakku aamma suliffeqarfitsigut tunngaviliunneqartunut inatsisini KNR-ip suliffeqarfittut namminersortutut pisortanit pigineqartutut aalajangersaafffigineqarneranut atorneqarsinnaanggillat. Tamatumunnga ilaatigut naalakkersuinikkut upperisarsiornikkullu soqutigisat kiffaanngissuseqarluni tusagassiutiginissaasa qulakeernissaasa isigniarnissaat pissutaavoq, tassanilu aamma suliffeqarfip allat akulerutinngikkaluarlugit sammisassat tusagassiorfiup nammineerluni sammissallugit toqqartassagai.

Ilanngullugu imm. 2-mi Atuisunut Siunnersuisoqatigiit 9-nik ilaasortaqassasut aalajangersagaavoq, taakkulu ukunannga inassuteqartoqarneratigut Naalakkersuisunit toqqarneqassapput:

- 1) Meeqqat illersuisuat, ilaasortassamik ataatsimik innersuussisussaq.
- 2) Oqaasileriffik, ilaasortassamik ataatsimik innersuussisussaq.
- 3) Kalaallit Nunaanni eqqumiitsuliortut kulturimillu ingerlatsisut nuna tamakkerlugu kattuffiat ilaasortassamik ataatsimik innersuussisussaq.
- 4) Kalaallit Nunaanni nuna tamakkerlugu innarluutillit kattuffiat ilaasortassamik ataatsimik innersuussisussaq.
- 5) Kalaallit Nunaanni tusarnaartartut isiginnaartartullu nuna tamakkerlugu kattuffiat ilaasortassamik ataatsimik innersuussisussaq.
- 6) Radioqarfip tv-qarfip nuna tamakkerlugu kattuffiat ilaasortassamik ataatsimik innersuussisussaq.
- 7) Ilisimatusarfik ilaasortassamik ataatsimik innersuussisussaq.
- 8) Nunaqarfip Nuna Tamakkerlugu Peqatigiiffiat ilaasortassamik ataatsimik innersuussisussaq.
- 9) Kalaallit Nunaanni Utoqqaat Peqatigiiffiat ilaasortassamik ataatsimik innersuussisussaq.

Inassuteqarsinnaatitaasut imm. 2-mi taaneqartut ilaannit inassuteqarnissaq pissarsiarineqarsinnaassanngippat ilaasortassamik suliassaqarfimmi inassuteqarsinnaasup sinniisuuffigisaani atuisut soqutigisaannut soqutigisalimmik Naalakkersuisut toqqaasinnaanerat imm. 3-mi aamma aalajangersarneqarpoq.

Atuisunut Siunnersuisoqatigiinni ilaasortat Kalaallit Nunaanni najugaqartuunissaat aammalut Inatsisartunut, kommunalbestyrelsimit Folkettingimullu ilaasortaannginnissat imaluunniit KNR-ip siulersuisuinut ilaasortaannginnissaat kiisalu KNR-imi imaluunniit sumiiffinni radioqarfip tv-qarfip nuna atorfiliunnginnissaat aalajangersakkami imm. 4-mi aamma aalajangersagaavoq.

Kiisalu KNR Atuisunut Siunnersuisoqatigiinnut allattoqarnermik isumaginnittussaasoq, Naalakkersuisut ilaasortanut najugartik qimallugu siunnersuisoqatigiit ataatsimiinnissaannut peqataajartortunut ullormusiat tunniunnissaannut angalanermullu aningaasartuutit taarsernissaannut tunineqartarneq pillugu Atuisunut Siunnersuisoqatigiinnut suleriaasissaq pillugu malittarisassanik aalajangersaasinnaanerannut aalajangersakkami imm. 5-7-mi malittarisassanik aalajangersaasoqarsimavoq.

Inatsisartut Inatsisaanni kapitali 6-imi pilerisaarisarnerit aningaasalersuisarnerillu pillugit aalajangersakkanik aalajangersaasoqarsimavoq.

Radiumi tv-milu pilerisaarutit imatut paasineqassasut § 44, imm. 1-imi aalajangersarneqarpoq:

- 1) Nioqquqtiisanut, kiffartuussinernut suliffeqarfiillu iluanaarniarnissamik siunertaqartut kaammattuutit nersorinninnerillu, aallakaatitassiamut akiliuteqartoqarsimagaluarpalluunniit.
- 2) Aningaasarsiornikkut soqutigisaqaqatigiit pillugit ilisimatitsissutit isummanillu saqqummiussinerit, assersuutigalugu inuussutissarsiuteqartut kattuffii, sulisitsisut kattuffii sulisartullu peqatigiiffii pillugit aammalu upperisarsiornikkut paasissutissiinerit politikkulluunniit isummiussat, peqatigiit taakkua isumaasa siuarsarneqarnissaat kaammattuutigineqarnissaallu siunertaralugit, aallakaatitassiamut akiliuteqartoqarsimagaluarpalluunniit.

Tamatuma saniatigut aalajangersakkami imm. 2-mi aalajangersagaavoq pilerisaarutit ilumut taamaattuunerat paasineqarsinnaasunngortinnejassasut, taamaalilluni imarisaat saqqummiunneqariaasiallu aallakaatitanit nalinginnaasunit allaanerunerat takuneqarsinnaassalluni,

Ilanngullugu § 45-mi pilerisaarutit annertussusissaat sumiinnissaallu pillugit malittarisassanik aalajangersaasoqarsimavoq.

Taamaasillunilu § 45, imm. 1-imi aalajangersarneqarpoq tv-mi, tekst tv eqqaassanngikkaanni, pilerisaarutit aggulullugit sivisunerpaamik minutini 5-ni aallakaatinneqarsinnaassasut, aggulunneqartullu aallakaatitsinerit akornanni inissinneqartassasut.

KNR radiukkut taamaallaat aallakaatitat akornanni pilerisaarutit aggulullugit sivisunerpaamik minutini 5-ni aallakaatitsisinnaasoq imm. 2-mi aalajangersagaavoq, imm. 3-milu pilerisaarutit aallakaatitat ullormut aallakaatitsiffiusup 10 procentii qaangerlugit aallakaatinneqartassanngitsut aalajangersarneqarsimalluni.

Tamatuma saniatigut § 46-mi tunisassianut immikkut ittunut, upperisarsiortunut aammalu politikkut partiinut pilerisaarinissat pillugit malittarisassanik aalajangersaasoqarsimavoq. Aalajangersakkamut nassuaatini atuarneqarsinnaavoq aalajangersagaq tamarmiulluni inatsisartut peqqussutaani atuuttumi § 52-imik atueqqinnerusoq, tassanilu immikkut

tunisassianut, upperisarsiornikkut naalakkersuinikkullu isummanut pilerisaarisarnerit pineqarput. Nassuaatinili erseqqissaatigineqartut apeqqutaatinnagit aalajangersakkami oqaasertaliussani aammalu Radiukkut tv-kkullu aallakaatitassortarneq pillugu Inatsisartut peqqussutaanni nr. 6, 14. november 2004-meersumi § 52-imi takuneqarsinnaanngilaq aalajangersakkami naalakkersuinikkut upperisarsiornikkullu isummat pineqarnersut.

§ 46, imm. 1-imi aalajangersagaavoq nakorsaatinut, tupanut, immiaaqqanut, viinninut imigassanullu aalakoornartortalinnut pilerisaarisoqassanngitsoq, taamaattoq imm. 3 takuuk.

Ilanngullugu aalajangersakkami imm. 2-mi atuarneqarsinnaavoq tv-mi upperisarsiornikkut ingerlatsisunut politikikkullu partiinut, katusseqatigiinnut, kisimiillutik qinigassanngortittunut imaluunniit suleqatigiiffinnut pilerisaarisoqassanngitsoq, taamaattoq imm. 3 takuuk.

Tamatuma saniatigut imm. 1-imi aamma 2-mi inerteqquteqartitsinerniit minitaqarnissaq pillugu Naalakkersuisut malittarisassanik aalajangersaasinnaasut aalajangersakkami imm. 3-mi aalajangersagaavoq.

Kiisalu § 47-mi piginnaatitsissummut aalajangersakkamik ilanngussisoqarsimavoq. Tamanna tunngavigalugu Naalakkersuisut aallakaatitassiornermi pilerisaarutit qanoq isillugit ilannguttarnissaannut malittarisassanik aalajangersaasinnaapput, soorlu suminngaanneersuunerat, inissinnissaat, oqaatsit imarisallu kiisalu pilerisaarutit annertussusissaat pillugit malittarisassat. Aammattaaq tassunga atatillugu Naalakkersuisut pilerisaarutit meeqqanut sammititat aamma tunisassiat meeqqanut sammititat pilerisaarutigineqartarerat pillugit malittarisassanik aalajangersaasinnaasut oqaaseqaatip appaani aalajangersakkani erseqqissarneqarpoq.

Radiup tv-llu iluanni pilerisaarisarnerit aningaasalersuisarnerillu aamma Radiumi tv-milu pilerisaarutit aningaasalersuisarnerillu pillugit Namminersornerullutik Oqartussat nalunaarutaanni nr. 8, 5. juli 2006-imeersumi malittarisassiorneqarput, taannalu Namminersorlutik nalunaarutaatigut nr. 37, 6. august 2021-meersutigut allanngortinneqarsimavoq.

Taamaasilluni tv-kkut upperisarsiornikkut ingerlatsisunut, politikikkut partiinut, katusseqatigiinnut, suleqatigiiffinnut aamma kisimiillutik qinigassanngortittunut pilerisaarutinik aallakaatitseqqusaannginnerit pillugit nalunaarummi § 17, imm. 1-imi aalajangersaasoqarpoq, taamaattoq imm. 3 takuuk.

Imm. 3-imi aalajangersarneqartumi qineqqusaartitsinernik taaneqartunik imm. 1-imi aamma imm. 2-mi aalajangersartuni aallakaatitsisarnerit inerteqqutaannginnerat aalajangersagaavoq, qineqqusaartitsillunilu aallakaatitsinermi ilanngussat politikikkut partiimit sananeqartut akilerneqartullu ilanngunneqarsinnaallutik. Soorlu aallarniummi taaneqareersoq tv-kkut

upperisarsiornikkut naalakkersuinikkulluunniit isummanut pilerisaarisoqarsinnaannginnera pillugu aalajangersakkami imm. 2 Radiumi tv-milu pilerisaarutit aningaasalersuisarnerillu pillugit Namminersornerullutik Oqartussat nalunaarutaata allangortinneratigut Namminersorlutik Oqartussat nalunaarutaatigut nr. 37, 6. august 2021-meersutigut atorunnaarpoq.

2.2. *Siunnersuut*

Aallakaatitassaliortarneq pillugu innuttaasunik soqutigisalinnillu attuumassutilinnik iluamik oqaloqateqartarnissap qulakteernissaa siunnersuummi siunertarineqarpoq, tamanna aqutigalugu aallakaatitassat pilersaarusrorneranni sapinngisamik innuttaasut soqutigisallillu kissaataat isigniarneqartassammata. Tamannali KNR-ip aallakaatitanik innuttaasuni soqutigisaqartuniit amerlanerussuteqartut kissaataannik taamaallaat aallakaatitsisarnissaanik kinguneqarnavianngilaq, tassami KNR-i kiffartuussivittut atuunnermigut aallakaatitassanik innuttaasut soqutigisallilluunniit amerlanerussuteqartut kissaatiginngikkaluagaannik peqarnissamik aamma qulakteernittussaammat.

§ 26-ip nutaamik oqaasertalerneratigut soqutigisallit attuumassutilit oqaloqatiginerisigut ilisimasamik taamaattumik KNR-ip ingerlatitseqqittarnissaa qulakteerneqassaaq, ilisimasallu tamakku ilisimatitsissutigisarnissaat atuisunut siunnersuisoqatigiinni siunertaasimagaluarpooq.

Siunnersuutip peqatigitillugu kingunerissavaa Inatsisartut Inatsisaanni malittarisassat atuisunut siunnersuisoqatigiinnut tungasut atorunnaarnissaat. Malittarisassat pineqartut tamarmik § 33-mi ilanngunneqarsimapput, taamaammallu atorunnaassallutik. Soorlu inatsisit atuuttut pillugit immikkoortumi 2.1-im i siulianiittumi taaneqareeroq siunertaq, toqqaasарneq, inassuteqartarneq, piffissaq atuuffissaq, piginnaasanut piumasaqaatit, allattoqarfimmi ikiorteqarnissaq aammalu angalanernut atatillugu angalanermut aningaasartuutit akilernissaat ullormusiallu tigunissaat pillugit apeqqut pineqarpoq.

Tv-kkut upperisassiornikkut naalakkersuinikkullu isummanut pilerisaarisarneq inerteqqutaammat siunnersuummi aamma aalajangersagaavoq. Soorlu aalajangersakkamut nassuaatini aamma atuarneqarsinnaasoq pisarneq malillugu tv-qarfik taannaassaaq aalajangersakkanik aqutsisussaq, tassungalu atatillugu nalilersuilluareernikkut upperisarsiornikkut naalakkersuinikkulluunniit isummanut pilerisaarineq ilumut pineqarnersoq aalajangiisartuussaaq.

Kiisalu siunnersuummi § 2, imm. 1-im takuneqarsinnaavoq siunnersuut ullormi 1. januar 2023 atuutilissasoq.

3. **Pisortanut aningaasaqarnikkut allaffissornikkullu kingunerisassai**

Atuisunut Siunnersuisoqatigut ataatsimiittarnerannut aningaasartuutit KNR-imut ingerlatsinermut aningaasaliissutaasut aqqtigalugit aningaasalersugaapput, suliffeqarfillu siunertamut tassunga 140.000 kr.-nit missaannik missingersuuteqarluni nalinginnaasumik

sulisarpoq. Ukiunili kingullerni ataatsimiinnerit ikippallaarsimancerat tunngavigalugu tamanna piviusunngungitsoorsimavoq. Tamanna aamma KNR-ip siunnersuisoqatigiinnut allattoqartitsinissamik pisussaaffianut tunngatillugu atuuppoq. KNR tassunga atatillugu siunnersummi § 1, imm. oqaaseqaatit siulermi suliassat taaneqartut naammassiniartarnissaat siunertalaralu nukissanik taaneqartunik atuisinnaasussaavoq.

4. Inuussutissarsiortunut aningaasaqarnikkut allaffissornikkullu kingunerisassai
Siunnersuutip inuussutissarsiutilinnut sunniuteqarnissaa ilimagineqanngilaq.

5. Avatangiisinut, pinngortitamut inuillu peqqissusaannut kingunerisinnaasai
Siunnersuut avatangiisinut pinngortitamullu sunniuteqassanngilaq.

6. Innuttaasunut kingunerisinnaasai

Siunnersuut KNR-ip aallakaatitassiortarneranut kissaatinut tunngatillugu KNI-ip innuttaasullu akornanni oqaloqateqarnerunermik qulakkeerinnissasoq ilimagineqarpoq.

7. Kingunerisinnaasai pingarnerit allat

Inatsisisstatut siunnersuut allatigut pingaarutilinnik kinguneqassanngilaq.

8. Pisortanik aamma kattuffinnik il.il. tusarniaaneq

Siunnersuut piffissami 13. april 2022-miit 11. maj 2022 tikillugu tusarniutigineqarsimavoq. Tusarniaarneq pillugu ilanngussaq 2 innersuussutigineqarpoq.

Siunnersuummi aalajangersakkanut ataasiakkaanut nassuaatit

§ 1-imut

Nr. 1-imut

Aalajangersagaq Inatsisartut inatsisaanni atuuttumi § 26-ip allanneqarneranik allanngortitsineruvoq.

Aalajangersakkami soqutigisallit attuumassutillit ilanngunneqarput, tassanilu KNR-ip oqartussanut, suliffeqarfinnut il.il. suliatigut ilisimasalinnut § 26-imi aalajangersakkanut taaneqartunut tunngatillugu soqutiginaateqarsinnaasunut oqaloqateqartarnissamik pisussaaffilernissaa siunertarineqarpoq. Tassaasinnaapput pisinnaatitaaffinnut suliallit, soorlu tamakkununnga illersuisut imaluunniit soqutigisallit oqaatsinut immikkut ilisimasallit.

Aalajangersakkami suliassamut aalajangersakkami taaneqartumut tunngatillugu KNR pisussaaffilerneqarpoq, kisiannili oqaloqatigiinneq qanoq isillugu qulakkeerneqassanersoq pineqarnani. KNR taamaasilluni tassunga periuserineqartussanik toqqaasinnaavoq.

Tamatuma saniatigut artikeli aalajangerneqanngitsoq aalajangersakkami "oqaloqatigiinnerup" siulianiittoq atorunnaarpoq, tassanilu oqaloqatigiinneq immikkorluinnaq ittoq anguniarneqanngimmat, kisiannili ataavartumik oqaloqatigiissinnaaneq anguniarneqarmat erseqqissarniarneqarpoq.

Soorlu nassuaatini nalinginnaasuni erseqqissarneqartuni takuneqarsinnaasoq KNR-ip pisussaaffinnik inatsisitigut aalajangersagaasunik aalajangersimasunik eqqortitsisarnissaa oqaloqatigiinnermi pingarnertut pineqartussaavoq aammalu suliffeqarfiuup pisussaaffinnik tamakkiisumik naammassinninniartarnissaanut pisariaqartinneqartunik ilisimasanik qaqugukkulluunniit pigisaqtarnissaa qulakkeerlugu. Tamanna assersuutigalugu atuisunut oqallitarfiit atuisunillu misissuinerit pilersinnerisigut pisinnaavoq.

Nr. 2-mut

Atuisunut Siunnersuisoqatigii pillugit malittarisassat aalajangersakkatigut atorunnaarsinnejarput. Tassunga atatillugu tamanna pillugu nassuaatini nalinginnaasuni erseqqissaatigineqartut innersuussutigineqarput, tassani siunnersuummi imm. 1 nangillugu Atuisunut Siunnersuisoqatigii siunnersuisarfiusut atorunnaarnerat pillugu § 33-imi erseqqissarneqarmat.

Nr. 3-mut

Aalajangersakkami tv-kkut upperisarsiornikkut naalakkersuinikkullu isummanut pilerisaaruteqarnissamut erseqqissumik inerteqquteqartitsineq atuutissasoq aalajangersakkami isumaavoq. Pisarneq malillugu tv-qarfik taannaassaaq aalajangersakkanik aqutsisussaq,

tassungalu atatillugu nalilersuilluareernikkut upperisarsiornikkut naalakkersuinikkulluunniit isummanut pilerisaarineq ilumut pineqarnersoq aalajangiisartussaq. Matumani suliap pineqartup inatsisitigut naliliiffiginera aallaavigalugu inatsisitigut aalajangiineq pineqarpoq.

Upperisarsiornikkut isummanut pilerisaarinerni oqariartuutit nalinginnaasut pineqarput, taakkulu upperisamut aalajangersimasunut isiginninnerup siuarsarnissaanut, soorlu upperisap pineqartup pitsaasumik oqaluttuarineratigut, pisinnaapput, tamakkulu allanneqartut ilisarnaatillu aqqutigalugit pisinnaapput. Aalajangersakkami tassunga atatillugu aamma upperisat aalajangersimasut isorineqarnerat pineqarsinnaavoq.

Politikkut isummernerit imatut paasineqassapput, inuiaqatigiit qanoq aaqqissuunneqarnissaannik aamma suliassaqarfinni aalajangersimasuni qanoq aalajangersaasoqarnissaanik isummat oqaaseqartarnerillu, tassunga ilangullugit nalilinnik aguataarinernut tunngasut. Kingullertut taaneqartumi assersuutigalugu pinngortitami pisuussutit, avatangiisnit akileraartarnermullu tunngasut, suaassutsimut naalakkersuinikkut sammisat, aguataarisarnikkut naalakkersuinikkullu pingaartitanut isummersuutit il.il. pineqarsinnaapput. Tassani sulinermi tv-kkut pilerisaarisarnerit assersuutaasinnaapput, matumani isiginnaartut suliassaqarfimmi aalajangersimasumi aalajangersimasumik politikeqarnissap pisariaqartinneqarneranik ilisimatinneqartussaallutik, soorlu suliassaqarfimmi pineqartumi politikip ingerlanneqartup isornartorsiorneqarsinnaanera.

Tamatuma saniatigut matumani nassuerterit pineqarsinnaapput, taakkulu massakkut naalakkersuinikkut oqallinnermi akulerutsitsiniarnermi aammalu inuiaqatigiinni tunngasunut aalajangersimasunut tunngatillugu isumaqatigiinngitsoqarnerani isummat aalajangersimasut siuarsarniarneqarsinnaapput nersorniarneqarsinnaallutilu. Tv-kkut pilerisaarinerit tassunga atatillugu oqaatsinik akerliusunik isumaqataasunillu imaqarsinnaapput peqataasut arlaanni soqutigisanik siursaasunik, taamaaliornikkullu tv-kkut pilerisaarineq politikkut isumaqatigiinnginnermi aalajangersimasumi arlaatigut isummamik ilangussinertut isigineqarsinnaammat.

Aammattaaq nassuaatini nalinginnaasuni aalajangersakkat pillugit erseqqissaatigineqartut innersuussutigineqarput.

§ 2-mut

Aalajangersakkami siunnersuutip atuutilerfissaa allanneqarpoq.

Atuisunut Siunnersuisoqatigiinnut atuuffiup naanerata kinguninngua inatsisip atortuulersinnissaa siunertalaralugu piffissaq atuutilerfiusussaq 1. januar 2023-mut aalajangerneqarpoq.

Siunnersuut inatsimmut atuuttumut sanilliullugu	
<i>Oqaasertaliunneqartut atuuttut</i>	<i>Inatsisissatut siunnersuut</i>
	<p style="text-align: center;">§ 1</p> <p>Radiukkut tv-kkullu aallakaatitsisarneq pillugu Inatsisartut Inatsisaanni nr. 7, 8. juni 2014-imeersumi makkuninnga allanngortitsisoqarpoq:</p>
<p>§ 26. Innuttaasut aallakaatitsineq pillugu tusarniarneqartarnissaat KNR-ip qulakkiissavaa.</p>	<p>1. § 26 imatut oqaasertalerneqassaaq: ” § 26. KNR aallakaatitassaliortarneq pillugu innuttaasunik soqtigisalinnillu attuumassutilinnik oqaloqateqartarnermik qulakkeerinnissaaq, pingaartumik KNR qanoq ililluni §§ 20 aamma 24 naapertorlugit pisussaaffimminik eqqortitsisinnaanersoq pillugu.”</p>
<p>§ 33. Naalakkersuisut Atuisut Siunnersuisoqatigiivinik pilersitsissapput KNR-ip aallakaatitassiornermini anguniagai suliassaalu, inatsimmi aalajangersarneqarsimasut, KNR-ip qanoq ililluni pitsaanerpaamik isumaginnissinnaanerinik KNR-ip siulersuisuinut siunnersuisussanik. Atuisut Siunnersuisoqatigiivi ukiut sisamakkaarlugit pilersinneqartassapput, siullermik 1. august 2014-imiit 31. december 2018-imut.</p> <p><i>Imm.</i> 2. Atuisut siunnersuisoqatigiiffianni qulingiluanik ilaasortaqaqtumi ilaasortat ukunannga innersuussisoqarneratigut Naalakkersuisunit toqqarneqartassapput:</p> <ol style="list-style-type: none"> 1) Meeqqat illersuisuat, ilaasortassamik ataatsimik innersuussisussaqaq. 2) Oqaasileriffik, ilaasortassamik ataatsimik innersuussisussaqaq. 3) Kalaallit Nunaanni eqqumiitsuliortut kulturimillu ingerlatsisut nuna tamakkerlugu kattuffiat ilaasortassamik ataatsimik innersuussisussaqaq. 4) Innarluutillit nuna tamakkerlugu kattuffiat 	<p>2. § 33 atorunnaarpoq.</p>

<p>ilaasortassamik ataatsimik innersuussisussaq.</p> <p>5) Kalaallit Nunaanni tusarnaartartut isiginnaartartullu nuna tamakkerlugu kattuffiat ilaasortassamik ataatsimik innersuussisussaq.</p> <p>6) Radioqarfiit tv-qarfiillu nuna tamakkerlugu kattuffiat ilaasortassamik ataatsimik innersuussisussaq.</p> <p>7) Ilisimatusarfik ilaasortassamik ataatsimik innersuussisussaq.</p> <p>8) Nunaqarfiit Nuna Tamakkerlugu Peqatigiiffiat ilaasortassamik ataatsimik innersuussisussaq.</p> <p>9) Kalaallit Nunaanni Utoqqaat Peqatigiiffiat ilaasortassamik ataatsimik innersuussisussaq.</p> <p><i>Imm. 3. Inassuteqarsinnaatitaasut imm. 2-mi taaneqartut arlaannit inassuteqartoqarsinnaanngippat Naalakkersuisut ilaasortassamik toqqaasinnaapput, toqqaasinnaatitaasup susassaqarfiata iluani atuisut soqtigisaannik sinnisuusinnaasumik.</i></p> <p><i>Imm. 4. Atuisut Siunnersuisoqatigiivini ilaasortat Kalaallit Nunaanni najugaqavissuussapput aammalu Inatsisartunut, kommunalbestyrelsimeut Folketingimullu ilaasortaassanatik taakkununngaluunniit qinigassanngortittuussanatik imaluunniit KNR-ip siulersuisuinut ilaasortaassanatik kiisalu KNR-imi imaluunniit sumiiffinni radioqarfinni tv-qarfinnilu atorfiliussanatik.</i></p> <p><i>Imm. 5. KNR Atuisut Siunnersuisoqatigiivinut allattuutitaqassaaq.</i></p> <p><i>Imm. 6. Atuisut Siunnersuisoqatigiivini suleriaasissami malittarisassat Naalakkersuisut aalajangersassavaat.</i></p> <p><i>Imm. 7. Atuisut Siunnersuisoqatigiivinut ilaasortat siunnersuisoqatigiit ataatsimiinnissaannut peqataaniarlutik</i></p>	
---	--

najukkaminnit aallartariaqartut ullormusiaqartinneqassapput angalanerminnullu akiliunneqarlutik malittarisassat Inatsisartunut, Naalakkersuisunut il.il. ilaasortat akiliunneqartarnerinik il.il. Inatsisartut Inatsisaanni kapitali 7-imiittut malillugit.	
<i>Imm. 2. Taamatuttaaq upperisarsioqatigiinnut politikikkut partiinut, kattusseqatigiinnut kisimiillutillu qinigassangortittunut imaluunniit taakkununnga atallutik suleqatigiinnut pilerisaaruteqaqqusaanngilaq, taamaattoq imm. 3 takuuk.</i>	3. § 46, imm. 2, imatut oqaasertalerneqassaaq: <i>"Imm. 2. Tv-kkut upperisarsioqatigiit naalakkersuinikkullu partiit, upperisorsiornikkut naalakkersuinikkullu isiginnittariaatsit, kattusseqatigiit aamma kisimiillutik qinigassangortittut imaluunniit taakkunani suleqatigiiffit aamma pilerisaarutigeqqusaanngillat, taamaattoq takuuk imm. 3."</i>
	§ 2 Inatsisartut inatsisaat ullormi 1. januar 2023 atuutilissaaq.

Tusarniaanermut allakkiaq

Inatsisisatut siunnersuut piffissami 13. april 2022-miit 11. maj 2022 tikillugu ukununnga tusarniaassutigineqarpoq:

Sulisitsisut (GE)

SIK

Kommune Kujalleq

Kommuneqarfik Sermersooq

Qeqqata kommunia

Avannaata Kommunia,

Kommune Qeqertalik

Nuuk Internationale Friskole

NUSUKA

Ilisimatusarfik

TP Kalaallit Nunaanni Tusagassiortut Peqatigiiffiat

NTK

Sermitsiaq AG

KNR

Oqaasileriffik

Tilioq

KANUNUPE

MIO

Kalaallit Nunaanni Utoqqaat Peqatigiiffiat

KIMIK

Eqquumiitsuliornikkut Pinngortitsisut Ingerlatsisullu

Katuaq

Kalaallit Nunaanni Timersoqatigiit Kattuffiat

Elite Sport Greenland

Inuk Media

Tele Greenland

Inuit Pisinnaatitaaffii pillugit Siunnersuisoqatigiit

Tusarniaanermut piffissaliussap naanerani tusarniaanermut akissutit ikittuinnaat tiguneqarsimapput, taakkulu tusarniaaffigineqartunit ukunanngaaneersuupput:

| KNR, Oqaasileriffik, Dansk Journalistforbund aamma Tusagassiuinermi Sulisut Peqatigiiffiat aamma Kommune Kujalleq. Kommune Kujalleq siunnersuummut oqaaseqaatissaqanngilaq.

KNR aallarniutigalugu Inatsisartut inatsisaanni § 26-mut § 33-mullu atuuttunut inatsimmi allanngortitsisoqarnissaanut isumaqataalluinnarluni erseqqissaateqarpoq, taamaasilluni

Atuisunut Siunnersuisoqatiguit aallakaatitassiorneq pillugu innuttaasunik soqutigisalinnillu attuumassutilinnik oqaloqateqartarnissamut KNR-p qulakkeerinnittarnissaanik taarserneqarlutik. § 46, imm. 2-p allanngortinneranut tunngatillugu assinganik atuutsitsisoqarpoq, tamatumalu kingorna tv-kkut naalakkersuinikkut upperisarsiornikkullu isignerriaatsinut pilerisaarisoqarsinnaannginnera pillugu malittarisassat equnneqaqqissallutik.

Kiisalu aamma tusarniaanermi akissutit ilanngunneqarput tiguneqartut Dansk Journalistforbund-imiit aamma Tusagassiunermi Sulisut Peqatigiiffiat, ilaliisinnaasut § 26-imik oqaasertaliineq pillugu. Peqatigiiffilli taamaattoq inassutigaat KNR inatsimmi allannguinermin Danmarks Radiup atuisunik isumasiortagaqarneranik isumassarsiorfeqartassasoq, kiisalu aamma isiginnaartartunik peqataatisarnermik TV2 Danmark-imi aammalu TV2-ip nunap immikkoortuini ingerlatsiviineersunik. Kiisalu peqatigiiffit erseqqissaatigaat KNR-ip aallakaatitassianik neqeroorutinimi amerlanerussuteqartut kissaataannik taamaallaat aallaaveqartassanngitsoq, ilaatigullu innersuullugu naalakkersuinermik suliaqartunit akuleruffigineqartannginnissamik ileqqoq.

Kiisalu aamma nalunaarneqarpoq peqatigiiffit siunnersuummi nr. 3-mut oqaaseqaatissaqanngitsut, tv-mi naalakkersuinermik upperisamillu tunngavilinnik ussassaarisinnaanermik inerteqquneqarneq.

Tassunga atatillugu tusarniaanermut akissutinut allakkiaq tullinnguuttuniittooq innersuussutigineqarpoq, tassaniippullu tusarniaanermut akissutit suliarineqarnerat oqaaseqarfiginerallu.

	Tusarniaavigi-neqartoq	Oqaaseqaatit	Oqaaseqaatigineqartumut oqaaseqaatit
1	Kommune Kujalleq	Kommune Kujalleq missingersuummut oqaaseqaatissaqanngilaq	Oqaaseqaatit siunnersuummi allannguinissamik kinguneqarsimannngillat.
2	KNR	KNR §§ 26 aamma 33 kiisalu § 43, imm. 2 pilligit allannguutissatut siunnersuutinut aallaaviatigut isumaqataalluinnarpoq.	Oqaaseqaatit siunnersuummi allannguinissamik kinguneqarsimannngillat. Aammattaaq § 43, imm. 2-mut innersuussuteqarnermi § 46, imm. 2 pineqarsimassaaq.
2.1	KNR	Tullinnguullugu § 46, imm. 2-p allanngortinneranut KNR aamma isumaqataavoq, tamatumalu	Oqaaseqaatit siunnersuummi allannguinissamik kinguneqarsimannngillat.

		kingorna tv-kkut naalakkersuinikkut upperisarsiornikkullu isiginneriaatsinut pilerisaarisoqarsinnaannginn era pillugu malittarisassat equnneqaqqissallutik.	
2.2	KNR	Ilaasortat tamakkerlugit katersuutsittarnerat imaluunnit ilaasortani amerlanerussuteqartut ataatsimiitsinniartarnerat assut ajornartarsimavoq, soorluttaarlu piissarsiarineqartut suunngingajattarsimasut.	Oqaaseqaatit siunnersuummi allannguinissamik kinguneqarsimannngillat.
2.3	KNR	Atuisunut Siunnersuisoqatigiit katitigaanerat assut equngavoq, tassami ilaasortat amerlanersaat tusarnaartartunut isiginnaartartunullu utoqqaanerusunut sinniisuummata. Tamanna aamma siunnersuisoqatigiinniit kissaataasut raadiukkut tv- kkullu aallakaatitassianik utoqqaanerusunut sammititanik sunnerneqarsimanerannik takussutissaqalersimavoq.	Oqaaseqaatit siunnersuummi allannguinissamik kinguneqarsimannngillat.
2.4	KNR	Suleqatigiiffiit toqqarneqarsimasut Atuisunut Siunnersuisoqatigiit ataatsimiinnerannut peqataarusuttarsimanngillat, taamaammallu ataatsimiinnernut	Oqaaseqaatit siunnersuummi allannguinissamik kinguneqarsimannngillat.

		takkutinngisaannarsimalluti k.	
2.5	KNR	<p>Atuisunut Siunnersuisoqatigiit aallakaatitassarineqartartut assigiinngitsut imarisaannut nalilersuiniarlutik nukippassuarnik atuisarsimapput. Tamanna aamma siunnersuisoqatigiit suliassaat kiisalu siulersuisut suliassaat naapertorlugit unamminartoqalerpoq, tassani siulersuisut aallakaatitassiarineqartut imarisassaannut akuleruttussaanngimmata.</p>	<p>Oqaaseqaatit siunnersuummi allannguinissamik kinguneqarsimannngillat.</p> <p>Tassunga atatillugu ilanngullugu oqaatigineqassaaq Atuisunut Siunnersuisoqatigiit imaluunniit siulersuisut KNR-ip aallakaatitassortarnerani imarinneqartunut akuleruttussaannginnerat.</p>
2.6.	KNR	<p>Atuisunut Siunnersuisoqatigiit nalilersuineri kingumoortuupput qaammatinik arlalinnik kinguaattoorfiusimasut. Atuisut oqallittarfiat sukkanerujussuarmik qisuariarsinnaavoq, soorluttaarlu KNR-p siulersuisui, taamaasillutillu aqutsisui, paasisassanut oqallittarfimmii pissarsiarineqartunut sukkanerujussuarmik iluaquteqarsinnaassallutik. Taamaaliornikkut paasisassat piviusunik tunngaveqarsinnaassapput misigissutsinillu imaluunniit oqallittarfinni isummanik pilersitsiffiusunik allanik, soorlu qarasaasiakkut inuit</p>	<p>Oqaaseqaatit siunnersuummi allannguinissamik kinguneqarsimannngillat.</p>

		naapittarfiit aqqutigalugit, tunngaveqartussaanatik.	
2.7	KNR	Atuisunut oqallittarfiit atornerisigut KNR-p siulersuisui assersuutigalugu paasissutissat nutaat tunngavigalugit tusarnaartartut isiginnaartartullu qanoq isumaqarnerannut sukkanerujussuarmik takussutissaqalersinnaassap put.	Oqaaseqaatit siunnersuummi allannguinissamik kinguneqarsimannngillat.
2.8	KNR	Atuisunut oqallittarfik arlalinnik ilaasortaqarsinnaavoq, akerlianilli atuisunut siunnersuisoqatigiinnut tunngatillugu siulersuisunut qarasaasiakkut piaartumillu saaffiginnissinnaapput, matumani tullermik ataatsimiinnissaq utaqqinngikkaluarlugu isumassarsianik allanillu siulersuisunut saqqummiussaqarusussimag unik. Isiginnaartartunut naalaartartunullu misissuinerit ikinnerpaamik 4-t atorneqassapput, soorluttaarlu KNR-i ukiumoortumik misissuisarnissanik amerlanernik periarfissaqassasoq atuisut oqallittarfiisa qulaajaaffigisassatut kissaatigisinnaasaannik. Taamaaliornikkut piviusunik tunngaveqarluni	Oqaaseqaatit siunnersuummi allannguinissamik kinguneqarsimannngillat.

		takussutissaqalersinnaassamat.	
2.9		<p>§ 46, imm. 2-mi allannguisoqarneranut tunngatillugu assersuutigalugu NGO-t naalakkersuinikkut isummertartut isummaminnik pilerisaarisarnissaat KNR-p pinngitsoortissinnaassavaa, soorlu partit imaluunniit NGO-t aningaasaateqarluartut qaqugukkulluunniit isummaminnik aalajangiusimasaminnillu pilerisaarisinnaasimattillugit, taamaasillutillu naalakkersuinikkut isummersoriaatsinut sunniniarsimatillugit.</p>	<p>Oqaaseqaatit siunnersuummi allannguinissamik kinguneqarsimannngillat.</p> <p>Ilanngullugulu malugeqquneqarpoq qinersinermut aallakaatitassianik taaneqartunik aallakaatitsisarneq periarfissaajuassamat, qinersinermut aallakaatitassiami ilanngussassat naalakkersuinikkut partiimit suliarineqartut akilerneqartullu ilanngunneqarsinnaassallutik, takuuk Radiumi tv-milu pilerisaarutit aallakaatitassianillu aningaasalersuisarnerit pillugit Namminersornerullutik Oqartussat nalunaarutaanni nr. 8, 5. Jul i 2006-imeersumi § 17, imm. 3.</p>
3	Oqaasileriffik	<p>Atuisartoqarnermut siunner-suisoqatigiit naalaartartut isiginnaartartullu sunniateqarnissaannut periarfissaasoq iluatissimanngilaq.</p>	<p>Oqaaseqaatit siunnersuummi allannguinissamik kinguneqarsimannngillat.</p> <p>Siunnersuummi allannguutis-samik siunnersuuteqartoqanganngilaq.</p>
3.1	Oqaasileriffik	<p>Inatsimmik allannguutissa-tut siunnersuummi eqqaane-qarpoq KNR Atuisartoqar-nermut siunnersuisoqatigiin-nut taarsiullugu innuttaasun-ik soqutigisaqartunillu matumanri naleqquttunik oqaloqateqartassasoq, aallakaatitassianik pilersaarusiortarnermut atatillugu, (allannguutissatut</p>	<p>Aallarniutigalugu oqaatigine-qassaaq matumanri pineqarmat “pisussaaffik”. Taamaasilluni oqaasertaliussami aalajanger-sakkap oqaasertaani nassuaatin-ilu namminerni ersippoq, aalajangersakkami KNR pisussaaffilerneqartoq ingerlaa-vartumik innuttaasunik soqutigisalinnillu allanrik naleqquttunik oqaloqa-teqartarnissamik,</p>

		<p>siunnersuut § 26-imut), kisiannili ersarinnerusumik allaaserineqarani oqaloqateqartarneq pineqartoq qanoq aaqqissuunneqartasanersoq, tamannalu KNR-pnammineq ilusilersussagaa.</p> <p>Siunnersuummi ersarinnerusinnaavoq pineqartoq pisussaaffik, ersarinnerusumillu allaaserineqarsinnaalluni oqaloqateqartarneq qanoq ittoq eqqarsaatigineqarnersoq, innuttaasunut tunngatillugu ingerlanneqartartusaq, Atuisartoqarnermut Siunnersuisoqatigiit taarserneqassappata pisussaaffimik, qanoq tusarnaartartut allatigut sunniuteqartarsinnanerminnik atuisarsinnanersut.</p>	<p>aallakaatitassiortarnermut atatillugu.</p> <p>Kiisalu siunnersuummut nassuaatini erseqqissarneqarsi-mavoq nr. 1-imut atatillugu pisussaaffik naammassineqartarsinnaasoq assersuutigalugu atuisartunik ataatsimiinnikkut isumasioqatigiissitsisarnikkut misissuititsisarnertigullu.</p> <p>Kiisalu aamma siunnersuummut nassuaatitut oqaaseqaatini ersippoq oqaloqatigiissitsisarneq minnerunngitsumik sammitinneqartassasoq KNR-ip inatsimmi aalajangersagaasunik pisussaaffiinut, qularnaarumallugu ingerlatsiviup sukkulluunniit ilisimasassat pisariaqartut pigigai, ingerlatsiviup pisussaaffiisa naammassisinna-nerinut atatillugu.</p> <p>KNR-ip ingerlatsivittut namminersortitatut inissisimaneraniit nutaarsiassaleriffittullu inissisimaneraniit aammalu naalakkersuinermiit suliaqartunit akuliuffigineqartussaannginnermik ileqquusoq tunngavigalugu tamatumunnga atatillugu isiginiarneqartassasoq ingerlatsiviup namminerisaminik aaqqissuuttassagaa pisussaaffimmi qanoq naammassineqartarnissaat.</p>
3.2	Oqaasileriffik	Oqaasileriffik kaammattuivoq Naalakkersuisoqarfiiup	Allaffissornikkut ingerlatsivimmik nutaamik ilassutitut pilersitsineq

	<p>isumaliutigissagaa aaqqiissutissaq alla, assersuutigalugu atorfimmik immikkoortumik pilersitsinikkut, innuttaasunik soqtigisa- qartunillu naleqquettunik allanik isumasioqateqartarnermik eqquassinissamut taarsiullu- gu.</p> <p>Atorfik taanna toqqaannar- tumik KNR-imut ingerlatsi- vimmulluunniit allamut aallakaatitsarermut akuersissummik pigisaqartumut atasuussanngilaq, aaqqis- suussaanikkulluunniit, kisiannili toqqaannartumik naalaartartunut isiginnaar- tarnullu atasuussalluni. Aaqqissuussinermi tassani suliarineqartassapput siunnersuutit, isornartorsiuinerit aamma naqqiutissat tusagassior- nikkut ileqqusanut atatillugu raadiumi tv-milu aallakaatitassiortarnermi, kiisalu ulluinnarni sulinermini tamat ammaffigissallugit.</p> <p>Atorfimmik taama ittumik pilersitsinikkut KNR aallakaatitsarermilu akuersissutinik pigisaqartut allat toqqaannartumik atuisartuniit allagarsisarunnaassapput, pisariaqassanngilarlu oqaloqatigiittarneq KNR-ip</p>	<p>oqaaseqaatini siunnersuutigine- qartutut ittoq sanieqqutsinerussaaq siunnersuutaasumik nutaarsiassalerinermik ingerlatsiviit tunngaviatigut aalajangiinernik qitiusumik ingerlatsisuusarnissaannik, ingerlatsiviullu nammineq tamanna pisussaaffigissagaa, avataani immikkut soqtigisanut atassuteqanngitsumik.</p> <p>Aaqqissuussineq siunnersuutigineqartoq aammattaaq akulerutissagaluarpoq piginnaanernut malittarisassani kapitali 7-imti Inatsisartut inatsisaanni nr. 17, 19. november 2007-imeersumi tusagassiorfinnut akisussaassuseqarneq pillugu Inatsisartut inatsisaanni aalajangersakkanut, tusagassiornermut akisussaaffiup Kalaallit Nunaanni tusagassiutit pillugit aalajangiisartunut suliassaatinneqarnera pillugu.</p>
--	---	---

		<p>inuttaasut soqutigisaqartullu allat naleqquttut akornanni, piffissarlu sipaerneqarsinna- voq siunertanut taakkununnga atorneqartaruartoq.</p> <p>Neriuutigaarput aaqqiissu- tissat allat isumaliutigine- qarnissaat</p> <p>Atuisartoqarnermik siunnersuisoqatigiinnik atorunnaarsitsinermut atatillugu, § 26-imut allannguutissatut siunnersuummut.</p>	
4	Dansk Journalistforbu nd aamma Tusagassiuiner mi Sulisut Peqatigiiffiat	<p>Peqatigiiffiup ilalerpaa § 26-imik oqaasertaliineq. Taamaattoq peqatigiiffiup inassutigumavaa KNR inatsimmik allannguinermi isumassarsiorumaartoq Danmarks Radio-p atusartunik isumasiortagaqarneranik, isiginnaartartunillu isumasiuisarneranik, Dammark-imi TV2-mi taassumalu immikkoortortaqarfifi ingerlanneqartartunik amma.</p>	Oqaaseqaatit siunnersuummi allannguinissamik kinguneqarsimannngillat.
4.1	Dansk Journalistforbu nd aamma Tusagassiuiner mi Sulisut Peqatigiiffiat	<p>KNR-ip aallakaatitanik neqeroorutai taamaallaat amerlanerussuteqartut kissaataannik tunngaveqassanngilaq, ilaatigullu pisortanit akuleruffigineqannginnissa mik ileqqoq innersunneqarpoq.</p>	Oqaaseqaatit siunnersuummi allannguinissamik kinguneqarsimannngillat.

4.2	Dansk Journalistforbu nd aamma Tusagassiuner mi Sulisut Peqatigiiffiat	Peqatigiiffit siunnersuummi nr. 3-mut oqaaseqaateqanngillat, naalakkersuinikkut upperisarsiornikkullu ussassaarisinnaanermik inerteqquteqarneq pillugu.	Oqaaseqaatit siunnersuummi allannguinissamik kinguneqarsimannngillat.
-----	---	---	---